



PRESS SECRETARIAT

MINISTRY OF THE PRIME MINISTER & CABINET

Apia, Samoa

Telephone : (685) 63222 ext 746, 747, 748, (685) 24799, (685) 26397

Fax : (685) 26322 Email: presssecretariat@samoa.ws

Press Release

25 March 2008

1. Tulafono Faatonutonu o Galuega a le Malo 2008.

Ua faamaonia e le Kapeneta le Tulafono Faatonutonu o Galuega a le Malo 2008.

O lenei Tulafono Faatonutonu ua faia e tusa ai ma le Vaega 72 o le Tulafono o Galuega a le Malo 2004. O le fa'amoemoe o lenei Tulafono Faatonutonu ina ia faatonu ai mataupu e tatau ma talafeagai mo le faamamaluina ma le faagaoioiga o le Tulafono Autu o Galuega a le Malo 2004, faapea tuutuuga ma aiaiga o le faafaigaluegaina o le aufaigaluega a le Malo. O lenei Tulafono Faatonutonu o loo faamautuina ai vaega nei:

- i. Faatulafonoina o le faamatuu atu o le malosiaga faaletulafono i Ulu;
- ii. Faamaoti mataupu a le aufaigaluega e tatau ona tapa ai se faaiuga a le Komisi, ma mataupu e faia ai le faaiuga a le Ulu;
- iii. Faasee ese mai i le Tulafono Faatonutonu aiaiga o faiga faavae (conditions & procedural requirements) mo le faafaigaluegaina o le aufaigaluega, a e faaofi i totonu o faatonuga o galuega;
- iv. Faamautuina o ituaiga tagata faigaluega le tumau;
- v. Taaofa'i o teuteuga eseese sa faia i le Tulafono Faatonutonu 1979.

I le faamaonia ai e le Kapeneta o lenei Tulafono Faatonutonu, ua tapena le Komisi e faia fesuiaiga ma faamautu Faatonuga o Galuega uma o loo i ai nei, aua le silafia e Matagaluega faapea le loaloa o le aufaigaluega a le Malo.

2. Tofia o le Pule Sili Faalapotopotga o Esetete Tausi a Samoa.

Ua faamaonia e le Kapeneta le toe tofia o le Tofa Fonoiaiva Sealiitu Sesega i le tofiga o le Pule Sili o le Faalapotopotoga o Esetete Tausi a Samoa (STEC).

I le faasalalauina ai o lenei avanoa, e tofa i latou sa tuuina ane a latou Tusi Talosaga, ma sa valaauina uma foi mo faatalatalanoaga. I le maea ai o iloiloga ma sailiiliga a le Komiti, ua toe tofia nei le Tofa Fonoiaiva Sealiitu Sesega, ma ua toe faauauau lana tautua mo le isi tolu (3) tausaga.

3. Malaga Afioga i le Palemia i le Fono a Minisita o Vaifafo o Malo o le Pasefika i Aukilani.

Na faamaonia e le Kapeneta le malaga atu o le Afioga i le Palemia, Susuga Tuilaepa S. Malielegaoi, e auai i le Fono a Minisita o Vaifafo o le Pasefika (Forum Foreign Ministers Meeting) e faia i Aukilani, Niu Sila, i le aso 26 o Mati 2008.

O le faamoemoe o lenei fono o le toe talanoaina o le mataupu ia Fiti, i tapenaga a lea Malo i le toe faafoi i faigamalo faatemokarasi. O lea fono sa taga'i ai i tapenaga ua i ai nei mo le faamoemoe ina ia mafai ona taunuu le faigapalota lautele a le Malo o Fiti i le amataga o le 2009. O le fono talu ai a Minisita o le Vaifafo a le Pasifika i lea lava mataupu i Port Vila, ia Mati 2007, sa muai fa'aataata ai le taimi e tatau ona toe agai ai Fiti e faafoi le faigamalo i tulaga faatemokarasi.

4. Fono Malo o Take ma Malo o le Pasifika.

Ua faamaonia e le Kapeneta le auai atu o le Minisita o Faamasinoga, Afioga Unasa Mesi Galo, e fai ma sui o le Afioga i le Palemia i le Fono Faapitoa a le Malo o Take ma Sui o Malo o le Pasefika e faia i Istanbul, aso 9 – 11 Aperila 2008.

O lenei fono sa taloina e le Malo o Take, e faatalatalanoa ai ma sui o Malo o le Pasefika ni auala e faamalosia ma faamautu ai upufai i va o Malo o le Pasefika ma le Malo o Take. O le a soalaupule ai foi nisi vaega fou e faamoemoe le Malo o Take e fia galulue felagolagoma'i ai ma Malo o le Pasefika. E i ai le faanauanauga o le Malo o Take ina ia avea i latou ma Sui Auai o le Post-Forum Dialogue Partners a Malo o le Pasefika, o le mataupu o loo fia talanoaina e Take i lea Fono.

O le a malaga faatasi le Afioga i le Minisita ma Pule o le Matagaluega o Faamasinoga ma le Faafoeina o Tulaga Tau Faamasino, Masinalupe Tusipa Masinalupe.

5. Lipoti o (1) Fono Iona Sefulu Komiti Faafae Faalapotopotoga Siosiomaga o le Lalolagi (UNEP) (2) Mafutaga a Minisita o Siosiomaga o le Lalolagi.

Ua faamaonia e le Kapeneta le Lipoti o le Fono faapitoa Iona Sefulu a le Komiti Faafae o le Faalapotopotoga o le Siosiomaga o le Lalolagi (UNEP), ma le Lipoti o le Mafutaga a Minisita o Siosiomaga o le Lalolagi, usua i Monte Carlo, Monaco i le aso 20 – 22 Fepuari 2008.

O nei fono e pei ona taua i luga, na usia faatasi i Monaco, ma o mataupu autu e lua sa lauliliuina e aofia ai:

- i. Vaegatupe mo le totogiina o luitau ona o fesuaiga o le tau. E aofia ai i lenei vaega ia galuega e taofia ai fesuaiga o le tau (Mitigation), atoa ma galuega e puipuia ai aafiaga mai fesuaiga o le tau (Adaptation).
- ii. Pulea o le siosiomaga i le lalolagi ma le faamalosia o auunaga a le UNEP.

Mo le usugafono a Samoa, na auai atu i ai le Minisita o Puna'oa Faanatura ma Sioiomaga, le Afioga Faumuina Tiatia Liuga faatasi ai ma le Minisita Lagolago, Afioga Tapuai Sepulona Moananu, ma le Pule Sili o le Matagaluega o Puna'oa Faanatura ma Siosiomaga, Tuuu Ieti Taule'alo.

6. Lipoti Faaaliga tau Turisi a le Los Angeles Travel & Adventure Show.

Ua faamaonia e le Kapeneta le Lipoti o Faaaliga tau Turisi a le Los Angeles Travel & Adventure Show, faia i Long Beach, Amerika 9 – 10 Fepuari 2008.

E silia ma le 70,000 le aofai o e sa auai i lenei faaaliga e aofia ai: turisi, ofisa malaga, pisinisi feaveaiina maimoaga, ofisa turisi, sui o faletalimalo faapea ma sui o atunuu eseese. O le faamoemoe maualuga, ina ia faalauiloa le lalelei faanatura o latou atunuu faapea a latou tu ma aganuu mo maimoaga ma tafaoga. Sa auai foi le silia i le 700 o le au faasalalau mo makasini, nusipepa, leitio ma televise, ma faasoa atu i ai faamatalaga tau turisi mo Samoa sa latou moomia.

Mo le Pulega o Tagata Tafafao Maimoa, sa faamamafaina le itu i le saogalemu ma le toafilemu o Samoa, faatusatusa i taua ma vevesi o loo feagai ai ma isi atunuu o le lalolagi ma le Pasefika. Sa faamamafaina foi le laufofoga fiafia o tagata Samoa ma le aga faaaloalo i soo se tagata. E le gata i lea a o le agaga talimalo ma faataua aiga, lotu ma le aganuu, o mea ia e mafai ona molimauina e soo se turisi e asiasi mai.

O isi itu mo le faalauiloaina o Samoa e aofia ai le: mama matagofie o alalafaga, sami, vaitafe, afu, vaituloto, lanulauava o le vaomatua ma atumauga; taugofie o faleoo tū matafaga e faapea foi totogi o femalagaiga; atinae o faletalimalo, fale taalo faavaomalo, uafu, taulaga ma vaa; malosi o tupe mai fafo pe a faaliliu i tupe Saamoa.

O sui o Samoa sa auai ai i lenei faaaliga e mai ia Aggie Greys Hotel, Samoa Sceneric Tours, Polynesian Xplorer, Sinalei Reef Resort ma le Pulega o Tagata Tafafao Maimoa a Samoa.

7. Lipoti Faaaliga tau Turisi Adventure & Backpacker Expo

Ua faamaonia e le Kapeneta le Lipoti o le faaaliga tau Turisi, Adventure & Backpacker Expo, faia i Melepone, 22 – 24 Fepuari 2008.

O le faamoemoe taua mo le Pulega o Tagata Tafafao Maimoa a Samoa, o le avanoa lea e saga faalauiloa atu ai Samoa o se atunuu matagofie mo lenei ituaiga maketi.

Sa tulimatai e lenei faaaliga tagata lautele aemaise i tagata tafafao maimoa i tau taugofie. E silia ma le 10,000 tagata sa auai ma sa iloga le alumia o le faatosina a Samoa ona o le lelei o le tulaga o le potu faaali oloa a le Pulega lea sa pito lava i luma.

O itu sa faamamafaina i le faalauiloaina o Samoa e aofia ai: lona matagofie, laufofoga fiafia o ona tagata, lanulaua'va o ona lafanua, mama ona vaitafe ma sami, taugofie o matafaga mo maimoaga, faleoo i luga o matafaga ma taumafa; lana aganuu faaaloalo, ava

i tagata, le talimalo ma faataua o aiga ma le lotu. Sa lagolagoina nei faalauiloa i ni ata sa pueina aua le maimoaina e tagata sa latou moomia ni faamatalaga ia Samoa.

E toatele i latou sa oo atu i ai le feau faalauiloa, aemaise o paaga fai pisinisi e fia malaga mai e asia pisinisi tau turisi i Samoa nei, ma faatupula'ia ai pea le aofai o i latou e fesootai pea ma le Pulega.

8. Fale Faamasino mo le Fale Mataaga.

Ua faamaonia e le Kapeneta le toe faaleleia o le fale tuai o le Malo o loo i ai le Ofisa o le Faamasinoga Maua luga a Samoa, atoa ma le fogafalealuga o loo i ai le Fale Mataaga.

E moomia le toe faaleleia ina ia saogalemu ma malupuipua faamaumauga ma measina a Samoa o loo teuina i lenei maota mo le faalauiloaina faapea maimoaga ma suesuega.

Ua matauina e le Matagaluega o Aoga, Taaloga ma Aganuu, ua sauniuni le Ofisa o Faamasinoga e masii atu i lo latou nofoaga fou o loo fauina i le taimi nei, ma o le avanoa lea e faaleleia ai lenei maota mo le faamoemoe i se Fale Mataaga.

O le tasi lenei o fausaga tuai o loo vaai pea ona foliga e pei ona sa i ai i aso ua mavae. E taua foi i le tala faasolopito o Samoa lenei fale faapea le fetaulaigaala o loo tu ai.

9. Lipoti Galuega Inisitiute o Suesuega & Atinae Faasaienisi a Samoa.

Ua faamaonia e le Kapeneta le lipoti o Galuega a le Inisitiute o Suesuega & Atinae Faasaienisi a Samoa.

Ua faatuina lenei inisitiute i lalo o le Tulafono o le Inisitiute (RIDS Act 2006) ma tofia ai loa le Pule Sili i le aso 15 Iulai 2006. O le sini o galuega tauave o le unaia lea o le tamaoiga o le atunuu e faavae i luga o suesuega ma atinae faasaienisi

O le tapenaga muamua, o le faaaupagaina lea i se afaigaluega agavaa atoa ma le faatotogaina i ni masini suesue faasaienisi faaneionapo. Ia tulai mai lenei inisitiute e i ai le tulaga o le faatinoga (capacity) atoa ma le mafai (capability) ona tautua atu e tusa o lona sini na faatuina ai.

O le itu i galuega faatino, ua aofia i lenei vaega le mafai ona faatino o suesuega faasaienisi i le faaaogaina o fale tuai o le Malo e fai ma fale suesue (research laboratories), atoa ai ma le mafai ona faatotogaina i masini faasaienisi faaonaponei.

E 18 le aofai o le afaigaluega ma o le 12 o i latou e galulue faasaienisi. E 10 e umia tikeri muamua o le faasaienisi, e toatasi e umia le MSc, e toatasi e umia le PhD. E moomia naua le fai o ni aoaoga faavaitaimi ina ia mafai ai ona lualuaina e le potu masani le potu faapotuaoga.

O loo agai poloketi i le faaaogaina o punaoa faanatura e aoga mo fefaatauaiga e i ai fua o faaeleleaga, aano o manifasi, figota o le sami ma vaitafe, fuamoa ma isi punaoa e maua

ai le ethanol poo le suauu e sui ai le penisini mo taavale. Ua i ai foi Matagaluega a le Malo, Faalapotopotoga Tumaoti, Aufaipisinisi faapea ma nisi ua saili mai i le insitiute mo fesoasoani ma fautuaga ma ua tuuina atu i ai.

Ina ia vave ona ausia lona aloaia faavaomalo, e tatau ai ona galulue ma faufautua i o tatou saienisi i latou ua lauiloa faavaomalo e pei o Professor Ron Wills, o ia lea ua tofia e le Komiti Faatonu e avea ma uluai Honorary Research Fellow a le inisitiute mo le tasi le tausaga. O loo faia foi feutagaiga ma Professor Peter Rogers mo le avea ma Honorary Research Fellow o le inisitiute i le lumanai.

Ua maea foi ona faamaonia e le Kapeneta le Fuafuaga Autasi a le insitiute e limataitaiina ai ana galuega mo le 2008 – 2010.

10. Malaga Minisita Soifua Maloloina Fono Gasegase o le Suka.

Ua faamaonia e le Kapeneta le malaga a le Afioga i le Minisita o le Soifua Maloloina, Afioga Gatoloaifaaga Amataga Alesana Gidlow, ma le Minisita Lagolago, Afioga Leao Talalelei Tuitama, i le fono a le Parliamentarians for Diabetes of the Western Pacific Region & Associated Meetings, faia i Ueligitone, 31 Mati – 3 Aperila 2008.

O le autu o lenei fono, o le tilofia lea o taiala o loo faaaogaina e atunuu o le Pasefika e agai ai le gasegase o le suka, aemaise le faatalanoaina o le tulaga o loo i ai nei lea faamai i totonu o atunuu o le Pasefika.

O loo valaauina i lenei fono i latou o loo i totonu o Palemene a atunuu o le Itulagi i Sisifo o le Pasefika.

11. \$45,000.00 mo le Asosi Siisiiga Uamea Mamafa a Samoa.

Ua faamaonia e le Kapeneta le tuuina atu o le fesoasoani tupe e \$45,000.00 mo le Asosi o Siisiiga Uamea Mamafa a Samoa mo le tauvaga faavaomalo e faia i Aukilani, aso 25 – 29 Mati 2008.

E auai uma atunuu o le Oceania i lenei tauvaga e aofia ai Niu Sila ma Ausetalia. O le faamoemoe mo le au a Samoa, ina ia saili ai ni sui o le atunuu mo Taaloga o le Olimipeka lea o le a faia i Saina.

Ua tuuina atu le faatonuga a le Kapeneta i le asosi ina ia vave ona fofu faafitauli o loo aafia ai lenei faagatama. Ia na o le toatasi le faiaoga e avea le 'au ma ia faataoto lelei ni faiga e saili ai se au taalo e masii atu i le tauvaga.

O loo faagasolo nei tapenaga a le Asosi, ma e toasefulu ma le lima le au taalo faatasi ma ofisa e toalua o le a malaga atu mo lenei tauvaga.

12. Valaauina Afioga Minisita Tina & Tamaitai Mafutaga Faaleaoaoga International Council of Women (ICW) & Fono a le Komiti Faafoe.

Ua faamaonia e le Kapeneta le auai atu o le Afioga i le Minisita o Tina ma Tamaitai, Afioga Fiamē Naomi Mataafa, mo le Mafutaga Faaleaoaoga a le Fono a Tina Faavaomalo e usuia i Jakarta, aso 4 – 7 Aperila 2008.

Ua valaauina le Afioga i le Minisita, o ia foi o le Peresetene o le Fono Aoa o Tina o Samoa, na te saunia le Saunoaga Autu e faatatau i le mataupu o le, “Tetee i le Sauaina o Tina ma Tamaitai.” Ua valaauina foi o ia e avea ma Taitaifono i le Vaega i Fefaatauaiga ma le Tetee atu i Sauaga i Tina & Tamaitai. Ma le isi, ua valaauina foi o ia e auai i le fono a le Komiti Faafoe o leni faalapotopotoga faavaomalo.

O le lona lua leni o Mafutaga Faaleaoaoga a le International Council of Women mo Asia ma le Pasefika.

13. Konekarate Tusia o Ata & Vaavaaia Galuega Fausia Ofisa Tutotonu Matagaluega o Aoga.

Ua faamaonia e le Kapeneta le tuuina atu o le Konekarate mo le Tusia o Ata ma Vaavaaia Galuega mo le Fauga o le Ofisa Tutotonu o le Matagaluega o Aoga.

Sa faasalalauina leni galuega mo ni tusi talosaga e pei o faiga masani a le Komiti o Tauofoga. Ma e toatolu kamupani na tuuina ane a latou ofo. I le maea ai o iloiloga ma suesuega a le Komiti, ua tuuina atu ai leni galuega i le Kamupani a le Irwin Alsop Architects mai Ausetalia i le tau aofai e US\$490,764.84, ma o loo faatupeina leni galuega e le Faletupe o Asia.

14. Fesuaiga o Tau o le Suauu & Penisini

Ua faamaonia e le Kapeneta le fesuaiga o tau o suauu & penisini e pei ona faaalua i le pepa o faamatalaga sa taulimaina. O loo faaalua i le ata o loo i lalo le fesuaiga o tau o suauu ma penisini i le masina o Mati ma Aperila 2008 i Samoa.

SUAUU	MATI	APERILA	FESUIAIGA
PENISINI	272.2 sene/lita	287.1 sene/lita	14.9 sene/lita (5.2%)
TINO	280.2 sene/lita	303.4 sene/lita	23.2 sene/lita (7.6%)
KARASINI	261.5 sene/lita	283.6 sene/lita	22.1 sene.lita (7.8%)

O le penisini o le a siitia i le 14.9 sene i le lita mai le \$2.72 i le \$2.87, o le tiso e 23.2 sene i le lita o le a siitia ai mai le \$2.80 i le \$3.03 ma le karasini e 22.1 sene i le lita o le a siitia ai mai le \$2.62 i le \$2.84 mo le masina o Aperila 2008

Ua faamafua leni siitaga ona o le maualuga atu o le aofai o suauu manaomia nai lo suauu o loo gaosia. E le gata i lea, a ona o le faatupulaia o le tamaoaiga faapea ai ma manaoga tau malosiaga o atunuu e pei o Initia ma Saina. Na lipotia foi mai fono a le

Faalapotopotoga o Atunuu e auina atu i fafo le Suauu (OPEC), le vaivai o le tamaoaiga o le Malo o Amerika atoa ma le loloto o le lamatia i maketi tau tupe, ua faatupulaia ai le tulaga lamatia o le tamaoaiga o le lalolagi ma aofia ai le tulaga o le suauu manaomia.

O loo faailoa atu i le ata o loo i lalo le tau o le suauu i nisi o atunuu o le Pasefika ma o loo manino mai ai le maualalo o le tau o suauu i Samoa pe a fua i Niu Sila, Ausetalia ma Fiti.

	SAMOA	AUSETALIA		NIU SILA		FITI	
	SAT	AUD	SAT	NZD	SAT	FJD	SAT
PENISINI	\$2.87	\$1.41	\$3.28	\$1.80	\$3.67	\$2.07	\$3.51
TISO	\$3.03	\$1.59	\$3.68	\$1.20	\$2.45	\$1.78	\$3.04

15. Gasegase e auina atu i fafo

Ua faamaonia e le Kapeneta le auina atu i Niu Sila o gasegase e toaono (6) mo suesuega atili atoa ma lo latou togafitiga. E toatolu (3) i latou o tamaitai ma ni alii se toatolu (3). E toatolu i latou e gasegase i le fatu; e toalua e gasegase i le fatuga'o; ma le toatasi e gasegase i lona tua..

O loo tumau pea le faiga faavae a le Malo i lona tauaveina o totogi mo suesuega faapea taotoga ma togafitiga, a e totogi e le gasegase lava ia lona pasese i le malaga atu ma le toe talii mai.

Government Press Secretariat.